



鐵馬之旅（詔安腔）

天討光个時，偈開窗子門，涼涼个風對面吹過來，一臨臨个香味得偈鼻著。啊！遐係玉蘭花个味。嗯！足香个！啾啾叫个鳥聲，有時大聲，有時細聲；聲調有時高，有時低，真成山歌對唱，滿足好聽！東片裡个天頂，金金黃黃个光線對雲鑽出來，千百萬條个黃金即對天頂直直照落來，得人感覺燒暖和歡喜。心肝內按想：恁好个晨早一定愛做一兜仔無共款个。所以，決定渡細子來去騎鐵馬，好好來識這個有一兜仔生份擱有一兜仔悉熟个所在。

隨著探險个心情，箭著一臺半舊老个鐵馬，「嘍嘍乖乖」叫。和細子一儕頭前一儕後背，有時務佢佇个正手裡，好定泥，又騎佇个揸手裡；兩子哀著面講事，著面騎，真心適！打先影著个係一大片青青个禾，佇彎彎幹幹个細條路脣，滿仔位攞係毋知名个小花小草，有白个，有黃个，擱有紅个，得風吹到搖來搖去，足成佇加偈人講：「勢早！」影起來嶄然靚。細子講，遐係「大花赤妹子」，係外國種，歸年攞有，實在真賤，真耐命！在地種个赤妹子，愛等到熱天正會用脛著佢開花，佢生活个環境得外來種佔去，今想討尋嘛難矣！偈細子對大自然觀察到恁斟酌，得偈有一兜仔著驚。細子講个事得偈感覺著：有真多个物件嘛若和赤妹子共款，漸漸尋無活落去个舞臺。生活个空間愈來愈狹，嘛愈來愈少，係毋係佇等有心人个發現和反發。英雄感覺有一兜仔艱難和無奈何！頭晃晃个，換一個心情；路脣个恬靜、自然，又擱得偈个心情好起來，頭前應該猶有擱較多得人快活个風景正著！偈人出力踐著鐵馬，一二、一二……，這個時務，好定泥想著一條歌，係按唱个：「偈騎著一臺鐵馬，討去路个盡尾……。青山綠水，鳥語花香，風光有幾靚……。」這條歌和偈人這嘛影著个、聽著个擱真倚意！

細子暢壞壞比著頭前講：「阿依，駁塍面上有人提望遠鏡佇看鳥呢。」幾時係一陣佢意騎鐵馬个朋友，隨望遠鏡來影濕地个鳥。經過佢人熱心个介紹，偈人了解家燕、洋燕、白卵鷺、屋簷鳥、夜呱仔，這兜鳥無共个所在。透過鏡頭，佢人即企佇个面頭前，目珠擘到金金影，兩儕離恁近，近到手伸出去即摸會著、搨會著个款。第一擺用高倍个望遠鏡，加普通時對偈人頭那頂飛過个鳥影到恁明，這種个感覺正經全然特別！

無幾遠个大樹下，有兩三個老儕真自然个坐佇泥下，啉茶答嘴鼓；佢人大嫲聲个笑聲，真錫人。雖然，講个攞做一下係大家作埕打拚个故事；對偈來講，這種个畫面識出現佇个心肝內底。猶記得細漢个時務，伯公廟脣遐頭大樹下，阿公和屋邊个阿叔、阿伯佇遐行棋、打紙牌；細子歸陣佇耍跳格子、點妖精、辦家貨……；耍毋罇，擱會用去溝子遐捉魚、捉湖鰻，嘛會用釣蜗子。恬恬耍得毋知暗，等到序大人出來尋，轉屋下一定係大鼓皮會鳴。遐陣子个情景，若係倒帶个電影一齣一齣慢慢浮出來！

毋知佇遐想幾久，細子寬寬揪个手，正略略仔轉來現時个空間；係毋係年歲越大，越會想著較早單純个生活？係對今現實个環境無滿意、絕望、抑係失志到毋知仰子正好，攔緊想討走轉成過个日子？敢係按？係毋知！係正經無答案！

幹過來影著細子得日頭炙到紅紅个面，現實生活內底係快活个抑係艱難个，這滿攏變到無要緊矣！今係干若想討和佢作埕騎鐵馬，享受得風對个面吹過，手擎起來即會摸著天遐款个快活自由。係感謝天地，感謝細子，送得个特別攏感心个春天晨早！

創 作 理 念

有一日，和細子作埕騎鐵馬；享受莊下个恬靜。愈騎愈心適。細子講个事、跔落來用心感覺軀身脣个一草一木、觀察對頭那頂飛過个鳥；得个有一種感動个感覺，所以，擎筆寫這篇鐵馬之旅！

李幸妃

雲林縣立東興國小鄉土語言支援教師

